

# Infohefte om skoleskyss skoleåret 2024/2025

For grunnskolar og kommunar



# Kven har rett på gratis skoleskyss?

Elevar har rett på gratis skoleskyss dersom eitt eller fleire punkt under gjeld for dei:

- Eleven har lenger enn fire kilometer avstand mellom heim og skole. Første trinn har rett på fri skoleskyss dersom skolevegen er lenger enn to kilometer kvar veg.
- Elevar som har varig eller mellombels funksjonshemming, sjukdom eller skade, og som på grunn av dette treng skyss for å komme seg på skolen.
- Elevar som har mindre enn fire kilometer lang skoleveg (to kilometer for første trinn), men som har ein særleg trafikkfarleg eller vanskeleg skoleveg

⇒ *Søknaden skal rettast til kommunen eleven bur i*

**Retten til skoleskyss gjeld til nærskolen. For privatskolar gjeld skyssretten innanfor heimkommunen.**


Detaljert skoleskyssreglement finn du på [www.skyss.no/skoleskyss](http://www.skyss.no/skoleskyss)

# Slik søker du om skoleskyss

Skolane søker om skyss for sine elevar i skoleskyss-systemet Skyss Elev, og godkjent skoleskyss blir sett opp utifrå informasjonen som skolen registrerer her.

Det er viktig at:

- Timeplanar, bustadfordelingar etc. blir kvalitetssikra før ein sender inn søknaden
- Skolen sender ny søknad dersom skyssbehovet endrar seg eller er lagt inn feil



Skole må sette seg inn i søknadssystemet Skyss Elev og regelverket.

Kommunen/skolen har rettleiingsplikt, og skal informere elevane om skyssrettane deira.

## Trinn m/timeplan for nytt skoleår

Trinn m/timeplan frå inneverande skoleår blir automatisk flytta opp til skoleåret 2024/2025, og kan ikkje endrast av skolane. Det er derfor viktig å sjekke at tidene er korrekte, slik at ikkje feil informasjon blir flytta opp. Ved endringar må de kontakte [skoleskyss@skyss.no](mailto:skoleskyss@skyss.no) med forklaring på kva den konkrete endringa er.

Dersom de melder inn endringar som Skyss ser kan vere utfordrande for skoleskyssen, vil vi ta kontakt med skolen. Dette er fordi dei same bussavgangane kan frakte elevar til fleire skolar.

Dersom skolen gjer endringar i start- og/eller sluttider etter fristen 1. mars kan ikkje Skyss garantere at desse blir imøtekomne, og endringar kan få konsekvensar for ventetida for elevane.

## Skolerute for skoleåret

Skoleskyssen blir sett opp etter kommunen si skolerute. Avvik frå kommunen si skolerute bør bli unngått, då dette kan få konsekvensar for skoleskyssen. Ved eventuelle avvik frå kommunen si skolerute må dato som er avvikande meldast til Skyss ([skoleskyss@skyss.no](mailto:skoleskyss@skyss.no)) innan 1. mars.



## Avvik i sluttider (siste dag før jul etc.)

Skoleskyssen er sett opp til ordinære start- og sluttider. Ved behov for transport til andre tidspunkt må skolen bestille og finansiere denne transporten sjølv. Kontakt buss- og drosjeoperatør direkte for endringar.



## **Frist for innmelding av søknadar**

Søknadar om skoleskyss skal registrerast i Skyss Elev innan 1. mars.

Skolane kan flytte opp søknadar som ikkje har endringar. De må opprette ny søknad på nye elevar og eksisterande elevar med endringar.

Skyss planlegg busskapasiteten til den enkelte skole ut frå talet på elevar som er meldt inn i Skyss Elev innan fristen. Dersom det blir meldt inn mange elevar etter fristen kan dette få konsekvensar for skoleskyssen, då ein risikerer for liten busskapasitet.



## **Sjekk status på søknad**

Vedtak vert sendt via Digipost til føresette, og skolane kan følgje med på status for søknadene i Skyss Elev

# Tilrettelagt skoleskyss med drosje

All skoleskyss skal som hovudregel utførast med kollektivtransport.

Elevar med rett til gratis skoleskyss som ikkje kan nytte seg av kollektivtilbodet, kan søkje om tilrettelagt skyss på heile eller delar av strekninga dersom eitt eller fleire av følgjande vilkår er oppfylt:

- behov for anna skyss enn buss grunna varig eller mellombels funksjonshemming/sjukdom
- manglande kollektivtilbod på strekninga der eleven har rett til skoleskyss anten på grunn av avstand eller særleg trafikkfarleg skoleveg

Ved søknad om skoleskyss på medisinsk grunnlag må skyssbehovet vere dokumentert med legeerklæring eller erklæring frå behandlande psykolog som inneheld:

- grunngjeving for kvifor eleven treng skyss
- kva slags type skyss eleven treng (buss, skyss utført med eige transportmiddel, drosje/tilrettelagt skyss)
- tidsrom for når eleven treng skyss (veker, månader, år)

Mangelfull erklæring frå lege/behandlande psykolog kan resultere i lengre saksbehandlingstid – og i enkelte tilfelle avslag på søknaden.



**Skyss samarbeider med den fylkeskommunale legenemnda**  
Legenemnda, bestående av spesialistar innan allmenmedisin, vil kunne vurdere legeerklæringa og vurdere eleven sitt transportbehov.

# Hentetider for tilrettelagt skyss

Tilrettelagt skoleskyss erstatter rutegående transport og er basert på samkøyring. Skoleskyssen blir sett opp til faste start- og sluttider, og konkrete hentetider kan skolen (ev. foreldre) få opplyst av den aktuelle drosjetransportøren etter at søknaden er godkjent.

Det er viktig at det er registrert rett timeplan for trinnet, eventuelt for eleven dersom eleven har egen tilrettelagt timeplan, då det er denne som er utgangspunkt for hentetider.

Transportør kan leggje opp køyreruta slik at eleven kan komme inntil 15 minutt før første time, og hentast inntil 15 minutt etter siste time.

Henting utanom faste hentetider i samband med akutt sjukdom fell utanfor retten til skoleskyss etter opplæringslova.



# Tilrettelagt skoleskyss med eige transportmiddel

Elevar med rett på tilrettelagt skoleskyss kan søke om å utføre skoleskyssen privat/med egen bil. Skoleskyss med eige transportmiddel skal vere søkt om i Skyss Elev og godkjent av Skyss på førehand.

For å få refusjon i samband med godkjent skoleskyss må skyssutøver sjølv føre krav om godtgjering i Visma Expense. Refusjonskrav blir utbetalt etter faste satsar etterskotsvis, og etter endt halvår (eventuelt skoleår).

Meir informasjon finn de her: <http://www.skyss.no/skoleskyss> under "Reglement og skjema" - Refusjon av utgifter til skoleskyss. Her finn skyssutøver mellom anna rettleiar for refusjon og aktuelle skjema for føring av refusjon.





# Bussopplæring

God trafikkopplæring bør skje i samspel mellom skole og heim, men føresette har hovudansvaret for trafikkopplæring av egne barn. Skolane har som oppgåve å gjennomføre trafikkopplæring kontinuerleg gjennom heile skoletida, og skolar som har elevar som reiser dagleg med buss bør øve på trygg bussåtferd.

I tilfelle der det er naudsynt med bussvakt på haldeplass eller under bussreisa er kommunen/skolen ansvarleg for dette. Trygg trafikk har gode øvingsoppgåver på [www.tryggtrafikk.no](http://www.tryggtrafikk.no).



# Kapasitet i skolebussane

Skoleskyssen blir planlagt ut frå talet på elevar med rett til skyss som er meldt inn av skolen innan søknadsfristen.

Det er viktig at skoleelevane spreier seg på dei bussavgangane som er tilgjengelege, for å sikre at alle får plass.

Dersom det likevel ofte er kapasitetsutfordringar må dette meldast inn til Skyss. I tilfelle med kapasitetsutfordringar der det ikkje finst tilgjengeleg ekstra bussmateriell, kan elevar utan skyssrett bli vist til det ordinære rutetilbodet.



# Rettleiande reise- og ventetid



Reise- og ventetid skal vere forsvarleg både med omsyn til den enkelte elev og til ei rasjonell organisering av skyssen. I vurderinga blir gangtid, ventetid og tid med transportmiddel sett i samanheng. I tillegg vert det lagt vekt på eleven sin alder.

Skyss skal etterstreve å organisere ei samla reisetid (ein veg) innanfor følgjande rammer:

Ca. 45 min for 1.-4. trinn

Ca. 60 min for 5.-7. trinn

Ca. 75 min for 8.-10. trinn

Elevar med lang avstand mellom heim og skole må rekne med lengre samla reisetid. Ved delt bustad vil vurderingane knytt til forsvarleg reisetid kunne avgrense retten til skyss frå begge bustadane. Ventetid (og tilsyn) før og etter skoletid er eit kommunalt ansvar, jf. Opplæringslova § 7-4.

# Skoleskyss for elevar som ikkje går på nærskolen sin

Nokre elevar har fått skoleplass på ein annan skole enn den dei soknar til (nærskolen). I slike tilfelle skal kommunen (ofte ved skolen) fatte vedtak om skoleplass.


Det vil i utgangspunktet ikkje påverke eleven sin rett til skoleskyss om dei går på ein annan skole enn nærskolen, men kommunen er ansvarleg for meirkostnadene for skyssen. Kommunen kan stille vilkår når dei innvilgar skoleplass på ein annan skole enn nærskolen, om at eleven ikkje får rett til skoleskyss utover det dei ville hatt til sin nærskole. Då må føresette syte for å dekke eventuell kostnad eller annan skyss som blir nødvendig fordi eleven går på skole utanfor skolekrinsen. Dette gjeld uansett grunnlag for skoleskyss (avstand, farleg veg eller funksjonshemming/skade).

Ved søknad om tilrettelagt skoleskyss med drosje er det viktig at skolen legg ved det kommunale vedtaket om skoleplass, slik at Skyss ser om det er stilt vilkår.

Kommunen er ansvarleg for å fakturere vidare meirkostnader for skoleskyss til føresette der det er sett vilkår. Der det ikkje er sett vilkår er det kommunen som må dekkje meirkostnaden. Skyss tilrår at det blir avklart med føresette om dei ønskjer at det blir søkt om tilrettelagt skoleskyss for eleven, og at dei føresette blir gjort merksame på dei økonomiske konsekvensane av dette.

# Skoleskyssbillett

Alle elevar som blir innvilga gratis skoleskyss, og som nyttar offentleg transport, får tildelt ein skoleskyssbillett for buss (ev. andre transportmiddel som båt, tog, ferje).




Skoleskyssbillettane er tilpassa skoleruta og gjeld med følgjande avgrensingar:

- Skoleskyssbilletten er gyldig mellom heimen og skolen
- Skoleskyssbilletten kan nyttast til 2 reiser pr. skoledag med eventuell omstiging
- Skoleskyssbilletten er ikkje gyldig i helger, feriar og fridagar
- Skoleskyssbilletten gjeld for maksimalt 190 skoledagar

Skoleskyssbilletten er personleg, og kan ikkje brukast av andre, eller på andre strekningar enn mellom heim og skole.

Skolen skal deaktivere elevar sin skoleskyss dersom eleven sluttar, flyttar eller av andre grunnar går ut av skyssordninga midt i skoleåret. Elevar som går ut av skyssordninga må levere inn fysisk skoleskyssbillett til skolen.





# Skoleskyssbillett på mobil

- For ungdoms- og vidaregåande skolar

Elevar med rett til fri skoleskyss ved ungdoms- og vidaregåande skolar i Vestland kunne frå skulestart hausten 2023 velje å få skoleskyssbilletten sin på mobilen.

Skoleskyssbilletten vil ligge i appen Skyss Billett, der billetten er aktiv og synleg på alle skoledagar.

Elevar som ønsker det, kan fortsette med dagens løysing med fysiske skolereisekort.

[Her finn du meir informasjon om skoleskyssbillett på mobil.](#)

## Kontaktinformasjon

**E-post:** [skoleskyss@skyss.no](mailto:skoleskyss@skyss.no)

**Telefon:** 55 55 90 70, tasteval 2.

(Opningstid mellom kl. 09-12 alle skoledagar)

**Nettside:** [www.skyss.no/skoleskyss](http://www.skyss.no/skoleskyss)

## Skoleskyss

Det er Skyss som har ansvar for skoleskyssen i Vestland.  
Elevar som har rett på dette, får innvilga gratis skoleskyss.

- NYHEIT: Skoleskyssbillett på mobil
- Skoleskyss i grunnskolen
- Skoleskyss i vidaregåande opplæring
- Ofte spurde spørsmål
- For skolane
- Reglement og skjema
- Kontakt skoleskyss

